

# لحظة صدق

ديوان شعر عامية

علاء عامر

الطبعة الأولى

2020م - 1442هـ

ديوان العرب

للنشر و التوزيع



عنوان الكتاب: لحظة صدق

اسم المؤلف: علاء عامر

التصنيف الأدبي: ديوان شعر عامية

رقم الإيداع: 2020 / 22048

الترقيم الدولي: 0 - 16 - 6749 - 977 - 978

التدقيق اللغوي: د. هبة ماردين

تصميم الغلاف: د. محمد وجيه

رقم الطبعة: الطبعة الأولى

التنسيق الداخلي: د. محمد وجيه

المدير العام: د. فادية محمد هندومة



دار ديوان العرب للنشر والتوزيع - مصر - بورسعيد

جوال: 00201211132879

البريد الإلكتروني: mohamedhamdy217217@gmail.com

حقوق الطبع والنشر لهذا المصنف محفوظة للمؤلف، ولا يجوز بأي صورة إعادة النشر الكلي أو الجزئي، أو نسخه أو تصويره أو ترجمته أو الاقتباس منه، أو تحويله رقمياً وإتاحته عبر شبكة الإنترنت، إلا بإذن كتابي مسبق من المؤلف أو الناشر.




# لحظة صدق

ديوان شعر عامية

علاء عامر





## هَدَاءٌ

إلى أمي... الحبيبة والطيبة والصفاء نهر الحنية ما عرفتش قيمته غير بعد ما  
فارقطني وسابتني في الدنيا وحيد.

إلى والدي... الإنسان الطيب الحنين على الكل أبو قلب طيب الي عمره ما  
شال من حد الي عمره ما خاف من مخلوق إلا من ربه الله يرحمة هو وأمي.  
إلى زوجتي... حبيبة قلبي وتوئم قلبي المتحملة انفعلاقي وتقلباتي وعصبيتي  
وثورتي عليها هي وبناتها من وقت للتاني، ربنا يبارك لي فيها ولا يحرمني  
منها.

إلى بناتي.. روان وچنا وياسمين... وخوفي عليهم من عالم غريب عايشين  
فيه، ربنا يحميهم، ويبارك لي فيهم.  
إلى الأستاذ... طارق الدسوقي.  
والأستاذة.. إيمان العادلي.

لكم مني كل شكر واحترام وتقدير..  
وفي الختام... أتمنى ديواني ينال إعجاب كل من يقرأه

## زي الحاج

قبل ما أكلت سميت

ولا هتقوللي...

زي عوايدك نسيت

معلش النوبة دي

ساحني المرة دي

شكلك حتى ما حمدتوش

على النعمة ما شكرتوش

طيب قوللي صليت

من قلبك ودعيت

ولا عشان ما حدش شايفك

وناسي إن ربنا شايفك.  
حتعمل ناصح ما أنا عارفك  
وهتكذب تملي عليا  
وهتعملهم عليا كالعادة  
وتقول آه طبعاً  
دا شيء مفروغ منه  
إلا الحاجة دي بالذات  
أنت معلمهالي... ومحفظهالي.  
ومخليني مواظب عليها  
حتى اسأل وأجاوبك  
مش هغلط وأقولك  
ومواظب على صلاتها.  
الصبح ولا الظهر ولا العصر

بالتمام والكمال  
وكله عال العال  
دنا برضو تربيتك  
وابنك وحبيبك  
مش كدة برضو يا حاج  
ربنا يخليك ليا  
ويطول لنا في عمرك  
وفضل الواد ابن امبارح  
في الدنيا سارح  
وعمره وياه يكبر  
شوية.. شوية  
وينسى يسمي  
قبل ما ياكل

والحاج فضل على سؤاله

لحد ما أجله جاله

وما فضلشي حد يقول له

سميت ولا ما سميتشي

هو الصبح

كان كام ركعة

حافظ لسه الفاتحة

ولا نسيتهها هي كمان

شكرته ولا ما شكرتوش

بس الواد لما عجز

وشاف نفسه زي الحاج

بدأ يعلم ابنه تاني

ويربيه على ما اتربي

واتعلم من أبوه

وهو قد ه ف سنه

ويكرر عليه ويقوله:

سميت ولا ما سميتشي؟

صليت ولا ما صليتشي؟

\*\*\*\*

## عيش الحياة..

عيش الحياة مراحل  
ما أنت مفارق وراحل  
الدينا مش وقفالك  
هيجي غيرك وبدالك  
عشان كدا عيشها  
كدا زي ما هي  
بجلوها.. بمورها..  
ربك وقايل عنها  
ما تسوى جناح بعوضة  
وأنت في الآخريا دوب

ما بتسوى متر.. ف أوضة

وذكرى دالو فاكرينها

حسب ما بتيجي سيرتها

دا كان.. وكان

عاش إنسان

طيب غلبان

الله يرحمه

دا.. أن اتقالت كمان.

\*\*\*\*

## قول يارب..

قول دائماً يارب

ارمي حمولك عليه

علق قلبك ليه

هو العالم بيك

مهما تشوف بعينيك

ولا تضيق من حواليك

دا ربك رب قلوب

العبد في التفكير

والرب في التدبير

هترزق زي الطير

بس أنت قرب ليه  
صلي وادعي كتير  
خلي صبرك كبير  
ما تياسثي  
ولا تحزنشي  
وما تستعجلشي  
فرجه تملي قريب.  
بس أنت قول يارب..

\*\*\*\*

## الخير شح

الخير شح

والبركة بح

وقلوب الناس

عائشة ف وسواس

خايفة لو بكرة ما جاش

حياتها إزاي تتعاش

تضرب أخماس

على أسداس

تجمع وتطرح

تضرب وتقسم

بورقة وقلم  
وتحسب حسبتها  
وتفك معادلتها  
بالسحتوت  
أهو يوم ويبفوت  
بتنقص فيه أيامك  
مش شايف أحلامك  
دايرة جواها دايرة  
بتشد فيها بالعافية  
وتشد هي بالتانية  
ساقية بألف ساقية  
وأحمال ونفوس شاقية  
تجيبك وتجبب آخرك

تلف بيك وتخليك  
ماتعرف فين عمرك  
ما تشوف فيها نفسك  
ماتحس فيها بسعادتك  
غير وأنت.. ميت

\*\*\*\*

## الناس الغلابة

ملك ولا كتابة

لسه الناس الغلابة

الشقيانة التعبانة

لقلوبها مليانة

خير ودفا

صابرة صبر أيوب

صابرة و متحملة

عايشة ومكملة

بتصلي فرضها

وشاكرة ربها

وعلى المولى متوكله

بنفس صافية طيبة

قوتها يوم بيوم

طقة... بطقة.

وهي ماشية بزق النوم

مش حاسبة فين رزقها

ولا شاغلة بال فكرها

غير أنها مستسلمة

وبقلة حيلتها

بخالقها مؤمنة

راضية بحالها مطمئة

على أمل تعيش

في الآخرة

شبعانة مش متنكدة

## شحات يا ناس

شحات يا ناس

حب وإحساس

التقوى بيهم

في الدنيا ديّا

بقينا خلاص

عايشنها خد وهات

اقلب ولخص

قصر وخلص

المصلحة لسه

مش مقضية

قاعد آهاتي

وقول ليلائي

مافيش حنية

صبحت حياتنا

مكن وترس

امتى ح نفوق

قبل الموت

ونفهم الدرس

في الدنيا ديّا

يا خلق الله

\*\*\*\*

## تيك أواي

عايز تحب

ونبض القلب

يجري يطب

خليك تيك أواي

تسمع حمويكا

ولا شاكوش أنتيكا

وتبقى بتاع مزيكا

خليك تيك أواي

تصاحب بنات

وتعمل شات

على ليكات

ف موييلات

خليك تيك أوي

تنده يا دادي

تقول يا مامي

بعيش أيامي

خليك تيك أوي

تعيش حياتك

في ملذاتك

عائش لذاتك

خليك تيك أوي

تشوف أفلام

رقص وإدمان

ودعارة كمان

مش أي كلام

خليك تيك أواي

ضعيفنا.. وضعيفنا

أحلام.. أولادنا

ماتت أخلاقنا

على مبادئنا

وبقيننا بنجري

على أي حاجة

تيك أواي..

\*\*\*\*

## السجلات..

وإن كتب في السجلات

في خانة الوفيات

بأنّ المذكور أعلاه

عاش إنسان ومات

بعد ما قضى

عمر بحاله

يتعب يشقى

لجل عياله

تعيش مستورة

في أحسن حال

عمره ما فكر لحظة ف نفسه  
ولا إنه يعيش له ف الدنيا يومين  
أصله عايش يسعد أهله  
راسم بسمه فيها مشقة  
مرسومة ف العين وع الجبهة  
حابس حزنه جوة ف قلبه  
خايف بس  
تبان ف ملامحه  
قبل ما ينهي رحلة عمره  
بشريط أسمر جنب صورته  
ويبقى صورة ف برواز  
متعلقة على الحيطان

## لحظة صدق..

لحظة صدق ما بيني وبينك  
شدت قلبي لحضن حنينك  
كانت تايهة في دنيا غريبة  
لاقت النور والحب ف عيدك  
قلبي اتمنى ف يوم رؤياك  
إنه يعيش العمر معاك  
والأيام بالحب تعدي  
نسمة بتضحك تحت سماك  
كل منايا أشوفك جنبي  
شمس تنور ضلمة دربي

وأسرح ويا النجمة التايهة  
أرسم صورتك ما تغيب عني

\*\*\*\*

## رغم الفراق..

رغم الفراق رغم السهر

بتذكرك ويا القمر

بعيش لقاك تحت الشجر

أيام ما كنا صغيرين

من كل قلبي بفكرك

أيام ما كنت بسهرك

وأخبي جبي وأحيرك

وتقولي راح حبك لمين

فاكر ضفايرك ع الكتاف

ولمستك ساعة ما خاف

وكلامك المليان عفاف

بيشد قلبي للحنين

\*\*\*\*

## آسف يا سي السيد

آسف يا سي السيد  
دنيا ما فيهاش ولا سيد  
زمننا ما بقاش زمن رجولة  
لا تقول عنتر ولا بطولة  
النخوة ما عدتش تتحرك فينا  
بايعنها وما حدش راضي يشتريها  
وبقينا ما بنسمع لهاش حس  
ولا عادت عايشة وسطينا  
دي بقيت ممسوحة باستيكة  
شطيينها من حياتنا

وعايشنها لا حول ولا قوة

حتى الشهامة

ماهاش عازة

بنسمع عنها زمان

ما تجييشي سيرتها

دي وجع دماغ

كبر دماغك

ما فيش مثالية

لا أنت كنت نبي

ولا حتى رسول

خليك غبي

وعيش ف الدنيا جبان

وامشي جنب الحيطه

ولا جوة حتى نفسك

المهم تعيش والسلام

تعيش إيه ما تسألش

سؤال مالوش جواب

\*\*\*\*

## ولا حد..

ما حدش واخذ منها حاجة

ما هي م الآخر دنيا فاي تنها

والكل عليها ضيوف

ما تزعلش في يوم من حد

ولا تعاتب في يوم حد

عشان ما فيش حد

قلبه على قلب حد

ولا حد بيخاف على حد

ولا حد بيتحمل حد

ولا تشكي شكوتك لحد

الشكوى لغير الله مذلة

ماهو ما فيش حد

بيطبطب على حد

ولو مرة حبيت حد

لا سمح الله حد

وطلع لمؤاخذة قليل الأصل

مالوش مثيل دا الحد

يبقى زعلك عليه مايفوقش الحد

وسرك بلاش تأمنه على حد

ساعة الزعل من دا الحد

يتبدل ويتغير دا الحد

والعشرة ماتهنوش على حد

بتعيش الحياة نحب حد

وساعات كثير بتكره حد  
وحبيب بيتمنى يكونله حد  
وتصاحب ناس مالها حد  
وناس نشوفها مسنودة على حد  
ونفقد ناس ونسيب ناس  
ونفضّل حد عن حد  
هو النهاردة إيه  
السبت ولا الحد؟

\*\*\*\*

## نصدق مين..

وبقيننا عايشين  
في الدنيا تايهين  
ما حناش عارفين  
الصح بقى فين  
والغلط غلط ليه  
نصدق مين  
نكذب مين  
نسقف ونشجع  
ونتهف لمين  
هو احنا إيه

مش فاهمين  
على فين رايحين  
والسكة طريقها فين  
عقولنا متلخبطة  
مشاعرنا متحيرة  
أحلامنا محبطة  
وحياتنا مية معكرة  
بقينا سمك بياكل بعضه  
بقينا تمر هندي  
على سلطة بلدي  
وأحنا عيشتنا  
بقيت طبق كشري..  
متلخبط.. تلاخبط..

## بلياتشو..

بلياتشو ورقص

على وتر قلبي

من كتر ما اتعلق بي

بلونة الزاهي ابتسملي

بضحكة المتخفي ندهلي

مبيل عليا وصف لي

حالة من حالي وقالي

بتداري ف توبي لتفضحني

دموع عيني وتعرفني

تسألني سؤال وما قدرشي

يتلاقى الرد معايا  
يتوه النبض جوايا  
من كلمة ما قولتهاش  
وفرحة لسه ما عيشتهاش  
ف دنيا سيرك ما عرفهاش  
بتغير عمري وإحساسي  
بتاخدني غريب ف أحلامي  
بتسيبني وحيد من تاني  
مستي تهل ما تنساني  
ف عالم محتاج بلياتشو  
يفرح قلبي الإنساني

\*\*\*\*

## تَهْمَتِي ..

حلمت بأني في محكمة  
حواليا ماشية ناس كثيرة  
وعيون تعيسة محزنة  
وقلوب بتخاف م الضمير  
يقول عليها حقيقة محجلة  
وناس قشرة بينا متزوقة  
فالصو بألوان بهتانة  
ولقيت نفسي ف أسامي  
أحمد محمد سامي  
داخلين بمحامي

يدافع عني ويحامي  
سألوني سؤال واتنين  
قالولي تبقى مين  
جاوب يا مسكين  
قلبي رد بجواب  
مكتوب برعشة عذاب  
بجروف بضي غاب  
أنا واحد غلبان  
بين الألوان بهتان  
مالوش بينا مكان  
في دنيا ما فيهاش أمان  
وعشان كات تهمني  
وكلمتي ف كل أن..



أنا يا دُوب إنسان

شوفتوا الهوان كمان

\*\*\*\*

## البال مشغول

ما فيش واحد مرتاح

في الدنيا دي

الكل بيعيشها مضغوط

البال تملي مشغول

دايماً على طول

بمليون حاجة وشغلانة

لا عنده ساعة يعيشها

ولو حتى دقيقة يرتاح

ينسى فيها مشاكله

يسرح فيها ويّا نفسه

يرتاح من همه الشايله  
يفتكر أيام ما كان زمان  
قبل المشاغل والمشاكل  
في الحياة قبل ما تاكله  
ولا يعرف وشه من ضهره

\*\*\*\*

## أمي

أمي ثلاث حروف

بداية شكلي وملامي

وبدمها كان رسمي

أول ما شافت عيني

وضمت قلبها ليا

تحضن وتهنن فيا

بجانها تسكت فيا

تبوسني من جبيني

تسمي وترقيني

وبقلبها تناديني

ننة..ننة.. هوووووة  
حبيبي نور عيني  
تخاف م العين لا تراعييني  
بتدعييي مع كل صلاة  
ربي يحميه ويبارك فيه  
نطق باسمها لساني  
وأول حرف ف حياتي  
بتحلم باليوم لأكبر فيه  
واليوم ل تشوفني فيه  
راجل نفرح بيه  
ملو هدومه وسط الناس  
أمي وربيتني  
علمتني الصفاء والطبية

والتسامح والإنسانية

الخير والوفاء

في الدنيا ديا

ما عمرهاش اشتكت

ولا شيلتني همها

وهي وف عز تعبها

وف عز مرضها

والآه بتقطع قلبها

ما قالتهاش لمخلوق

إلا لربها

واستحملت كتير قوي

مع كل دا

البسمة ما فرقتش

وشها الصافي  
وكلمة الحمد كانت  
ديماً على لسانها  
بتحمده وبتشكره  
وآخر كلامها  
كانت الشهادة  
ووصية وصتها  
وسابت الدنيا وسابتني  
وهي لسه مبتسمة  
وعينيها على الجنة

\*\*\*\*

## عيشيني

عيشيني يا دنيتي

بس النهاردة

موتيني على مهلك

موافق ولو بكرة

مش ف الآخر موة

ماهياش معايا فارقة

المهم عندي أعيش

أصحى م النوم ألاقى

ف جيبى حق الرغيف

وعيالى تستر وتعيش

ومراتي لا تلوي بوزها  
شبرين وتهيص  
ولا تشكي حالها لي حماتي  
ويزيد همي يوماتي  
والناس من غلبها  
م الحياة وغلوها  
م الضيقة لي فقلبها  
بقيت تكلم نفسها  
هي القيامة قربت  
ولا لسه بدري  
عليها شويتين

\*\*\*\*

## في حاجات

في حاجات

مع مرور العمر

وفعل الزمن

جوانا بتدوب وتموت

بننسى معاها حاجات

ونفتكر ف حاجات

كان نفسنا تفضل

تعيش فينا

ونفكر ف حاجات

عائزئنها تعئش لنا  
وحاجات بتتبدل بحاجات  
وتتغير كل يوم حاجة  
حلوة كات فينا

\*\*\*\*

## وحشاني

حبيبة قلبي وحشاني

ساعات تملئ تنساني

بعشقها... وعشقها

علم قلبي السهر

بسمتها بسمة قمر

تحن ليها

تعشق عينيها

تدوب فيها

عشقها عشق وقدر

مكتوب علياً أدوب

من حبها ما تتوب

هي حبيبتك

وأنت حبيبها

قلبها قلب مدينتك

تبقى أميرتك

تبقى محبوبتك

وأنت يا دوب..

صعلوك...

\*\*\*\*

## ممکن تتجوزيني؟

بتجيب ف سيرته

بتحكي حكايته

من أولها

وهي فرحانة بيه

بتقول عليه لصحابها

بعلو ما في صوتها

بضحكتها المالية خدودها

وحلاوتها قدام أصحابها

ازاي بدأ يعشقها

وفين وإمتى عرفها

وتعلق جداً بيها  
ودايب دوب فيها  
يوم ما عينيه  
شافت عينيها  
وقلبه بدأ يدق  
ويدشاور بجد عليها  
والنوم الطائر منه  
والحلم البيلاعب قلبه  
لو يوم يوصل ليها  
وتحس بصدق مشاعره  
وينول قلبها  
من وسط الناس كلها  
ويقولها بحبك موت

ممکن تتجوزيني؟

وأعيش عمري ف ضي عينيكي

ممکن تتجوزيني

يا اسمك أيه؟؟

\*\*\*\*

## أنت أيه؟؟

أنت أيه غير ورقة

بدايتك ف الدنيا بورقة

نهاية عمرك بورقة

ورقة بينكتب فيها ميلادك

ورقة مكتوبة بتاريخ وفاتك

ورقة بتدخلك عريس

يا تعيش سعيد

ولا تعيش

الله أعلم

ورقة ف ملف وظيفتك

يا تطلعك فوق  
يا تنزلك تحت  
وآخر مشوارك  
كل أوراقك تتبعتر  
على شجرة حياتك  
تدبل وتحف بيك

\*\*\*\*

## حلم

لو كنت لسه حلم

لسه ما اكمل

خليني قصة عشق

تعيش بالأمل

خليني ضي بيضوي

ما بينتهي ضيه

ف قلبك تعشقيه

تحبيه تتمنيه

يبدل الليل الحزين

لو يوم اكمل

وارسميني زي ما تحلمي

فارس نبيل

ف زمن بخيل

أو حتى طير

قلبه بجبك ييميل

ويكون لك وفي

\*\*\*\*

## وحشتيني

أيوه وحشتيني  
بقولها بصوت عالي  
ماليش حبيب تاني  
تروح الروح مني  
وأنتي بعيدة عني  
من غيرك فاهمني  
وعارفة أيه شاغلني  
يا ساكنة وجداني  
وقت الفرحة بلقاكي  
بتفرحي قلبي

وقت الحزن بلقاكي  
بتشيلي من عني  
وف غضبي.. وانفعالي  
وثورتي.. ويأسي  
بلقاكي بتسامحي  
وبتتبسمي ف عيوني  
ساعتها بس بحس  
وبخجل من نفسي  
وبتألم وبجزن كثير أوي  
والطفل الطيب فيا  
أبو قلب أبيض  
عايز يجري يتشعلق  
ف حضن أمه

يداري دمعته فيها  
عشان تطبط عليه  
وف حضنها ترقية  
وتساحه من تاني  
وتدعيه بأن...  
ربنا يهديه!!

\*\*\*\*

## الدنيا تلاهي

الدنيا تلاهي ملاهي  
ما حدش فاضي للتاني  
بيوتنا صبحت فاضية  
خالية م الحب الرباني  
مافيهاش ولا ضحكة صافية  
لو حتى مرسومة ف القلب  
وعلى الوش  
الشارع بيربي البيت  
والنت كمل ع الدش  
وبقيننا نقول ياريت

لو نرجع مرة زمان  
كنت علمت وسويت  
كنت بنيت وعلمت وربيت  
وماكنش الحال بقى دا الحال  
ولا نهرب من أي سؤال  
يتقال لينا من أصغر طفل  
هو احنا ليه بختنا مآل  
وبقيناً ديماً بنغش  
وبميت وش!!

\*\*\*\*

## قلبي يا طير

قلبي يا طير حزين

بتعشق كثير وتئن

بتحلم تاني وبتحن

بتعيش تهوى وما بتلقاش

وتضيع أحلامك بلاش

عمرك بينفرط منك

ما بتحس بيه لأنك

بترحل ويا حزنك

بتدور على قلبك

بعد طول نسيان

من سنين حرمان

عيشتها وحدك

ولقيتها بتحبيك

ف آخر الزمان

\*\*\*\*

## يا صبية

وبجبك يا صبية لو  
عصفورة طيارة ف الجو  
بتغني الدنيا هتخلو  
ولامرة خافت م العو  
أيامها بتحب الضو  
وبتضحك ضحكة هأو  
مش فارقة معاها كتير  
إن كنت غني ولا فقير  
أيه يعني نومتي على حصير

دي اللقمة بسيطة وبتفيض

والقلب متهني وسعيد

دا الدنيا ها تتعاش لو حتى

شايفين كان فيها أيه!

\*\*\*\*

## فضلت أحبك

وفضلت أحبك

لآخر نفس فيا

لآخر رمق ليا

غرق قلبي ف بحرك

مالقاش غير حبك

يبقى نجاة ليا

ماكنش هاممني شكلك

ولا أيه كان رسمك

ولا حتى مين ف حسنك

قلبي العاشق عشقك

من ضحكتك ليا  
وبعد كذا تاني  
عايزاني أنسى ف ثواني  
عملتي أيه فيا

\*\*\*\*

## أنت الكسبان

سيبك منها

ولا تسأل عنها

فكك وكبر دماغك

دور على غيرها

بنت مش قد..

المسؤولية خالص

واحدة دخلت حياتك

زي ما قبلها كثير

دخلوا وخرجوا منها

أنت الكسبان.

مش الخسران..  
صدقني واسمعني  
صحيح علمت عليك  
بس جرح بسيط  
والأيام بتداويه بسهولة  
ويبعدي أوام...  
ويتبقى بالنسبة ليك زي  
نكته بتضحك عليها  
كل ما بتيجي حكايتها  
ولا واحدة تجيب  
خبر قدامك عنها  
ولا عن كتر مشاكلها  
الي ديماً ما بتخلصي

وأنت حافظها وعارفها

ساعتها تحمد ربك

وتشكره كثير قوي

أنك ما وقعتش

واتدبست فيها

ف قول الحمد لله

بدري.. بدري..

خلصت من بلاويها

قبل الفاس ما تقع

على الرأس

وتبني بيت

مالوش أساس

يتهد عليك

ف دقيقة يا معلم

وساعتها لا تنفع حاجة

ولا يحزنون

\*\*\*\*

## البنـت

البنـت لما بتحب بجنون  
ما بتشوفشي حد ف الكون  
إلا البتـحبه وبس  
بتشوف ف عيوبه حسـنات  
والباقـي ف نظرها تفاهات  
وحبيـبها ملاك ع الأرض  
وما فيش زيـه ف الأرض  
ف مرآة الحب العامية  
بتلغي العقل ف ثانية  
وبتعمل عمايلها بسرعة

جوة القلب زي البرق  
وتفضل عايشة ف أحلام  
تتفرج ع الأفلام  
تتخيل نفسها ف بطولة  
وتغني أغنية م الأغنيات  
وتعيش فترة رومانسية  
ف حياتها الأولى الوردية  
قبل ما تفوق من أحلامها  
وتكسر بأديها مرآيتها  
الكذابة الخداعة  
بعد ما عرفت حقيقتها  
وحبيبها ما طلعتش حبيبها  
دي كانت قصة وعاشتها

وعرفت نهايتها

وفاقت من قرأيتها

بعد ما دابت مشاعرها

وبقيت واحدة ثانية من غير

مشاعر طفولية

\*\*\*\*

## مين فينا

مين فينا

ف الدنيا دي

ما عاش محروم

كان بيحلم حلم

ف يوم ممكن يتحقق

لو حتى شيء صغير

وما تحققتي

ونام وحزنه ف قلبه

ودموعه مالية خده

جسد صحيح نايم

بس باله مشغول

ديماً على طول

مين فينا

ما تمناش ف لحظة

وأحنا عايشنها مراهقة

إن حبيبته أول حبة

العايشة ف أحلامه باستمرار

الشاغلة فكره ليل ونهار

تبقى ف يوم توءم روحة

أم ولاده

يقضي معاها عمره

ويعيش إنسان سعيد

مين فينا

ما كاذش بيفكر  
وهو لسه صغير  
عودة لسه أخضر  
إن الحياة راح تبتسمله  
والدنيا تبقى كلها ملكه  
بيعيشها لوحده  
مرسومة على شكله  
وعلى مقاسه  
ومافيش غيره  
ف الدنيا دي  
وأى مشكلة بتعدي  
بتخلص بحضن كبير  
وكلمة حلوة وابتسامه

میں فینا..

ولسہ ہنفضل ونقول

میں فینا

میں فینا

علی طول

\*\*\*\*

## عارفة

عارفة لما يتسرق

منك عمرك

وتحسي أنك

ف سباق على رزقك

على حلمك وسعادتك

وتفضلي تجري... تجري

لآخر نفس فيكي

ممك تتعي

تعي وتكعبي

تصرخي وتبي

وأنتي بتنهجي  
شايلة همومك  
بتمسحي دموعك  
من تعبك  
ما بتلاقيش أي إنسان  
يطبب عليكي  
ياخد بإيديكي  
يقولك كلمتين  
اتنين بساط  
يطيبوا قلبك  
بشدي حيلك  
اصلي ضهرك  
الله معاكي

في دنيتك  
ويخفف حملك  
قربتي خلاص لآخر سكتك  
وتمشي ف طريقك وحدك  
بلا عكاز ولا مدد  
أنتي وربك  
وتبقى النهاية  
مش زي البداية  
وطريق ما فيهوش رجوع  
ما فيهوش تاني رجوع

\*\*\*\*

## صباح الورد

صباح الورد والياسمين

على الناس الحلوين

يجعل يومكم

جميل وسعيد

تلقى البسمة

صبحت نسمة

تملى الكون

حتى الضحكة

طالعة صافية

حلوة شقية

ف قلب حنون

فيها فرح

لعب ومرح

تعيش نهارك

زي أزهارك

ف رقة ودلع

وأنت... مبسوط

\*\*\*\*

## إزاي

إزاي نسيتيني

وقدرتي تبعديني

وأنتي فرحة سنييني

أنا مش حبيبك

وأنتي حبيبتي

أنتي دنييتي

لسه محتاج حضنك

ما أنتي صديقتي

وسرك سري

وحتىه مني

إزاي اتغيرتي  
بكل سهولة  
تنسي أوام  
كام ذكرى  
كانت بينا  
ودموع سالت  
ع الخد بانتي  
حكيت وقلت  
على مشاعرنا  
ولهفة وشوق  
ولمسة أيد  
ف ميعاد كان بينا

أكيد كنتي

وخداني سلم

لحد تاني

وأنا بطيبتي صدقتك

وما فكرتش غير فيكي

وفتحلك قلبي

عشان آه حبيتك

بس للأسف

عرفت دا متأخر

أصل خداعك وكذبك

شاطرة وموهوبة فيه

تستحقي جايزة نوبل عليه

روحي الله يسامحك  
يرزقك بواحد زيك  
ويرزقني بواحدة تحبني  
وتقدرني وأحسن منك  
مليوووون مرة

\*\*\*\*

## فوات الأوان

ما حسيتش بيك

غير لما سبتني

كنت زمان عيل أوي

بشوح بأيدي ولا بيهمني

وأضرب بوز شبرين

من أيها حاجة مضيقاني

وبلضم بكلام

أهوأي كلام

والسلام وخلاص

مش مفهوم

تقولشي عاقل على مجنون

وأقول ف سري

إمتي بكرة أكبر

وأبقى راجل تمام

ويطلعلي شنب زي أبويا

وأشخط وأنتر

بصوت عالي

وأعمل فيها راجل

ولا يهمني

وأيه بس هيهمني

ومش هافور

وأمشي وأتغندر

وعمل كل حاجة  
تيجي على بالي  
براحتي وبمزاجي  
وما حدش كابس  
على زمارة أنفاسي  
وأوامر تعكنني  
تطلع عيني  
تعملها غوميسي  
ما تروحش مع فلان  
ما تصاحبشي ترتان  
ولا تكلم مع علان  
وما تعملش الحاجات

دي عشان  
أعملها براحتي  
وعلى هوى هوايا  
وكيف كيني  
وأطلع من الودان  
اليمين قبل الشمال  
لو حتى أيه اتقال  
الي مش عاجبي  
ما هو مش هامني  
بس كان برغم دا  
كان بيعاتبني  
بعينه بيحاسبني  
ويقولي يا ابني

وأنا ضارب طناش  
عايزك تعقل شوية  
أنا مش عايش لك  
وأنا ما فهمتهاش  
فاكر الدنيا هتضحكي  
بأيديها الاتنين  
هتكبش وتعرفلي  
أما صحيح عبيط  
لي ما يحسبهاش  
وعرفت قيمتك بس  
بعد فوات الأوان  
وكل كلمة قولتها لي  
كانت حكمة وميزان

ما فوقتش وعرفت حقيقتها

الغايبة من زمان

بعد ما بقيت شحط كبير

صاحب عيلة كمان

\*\*\*\*

## بتنفسك عشق

بتنفسك عشق

وف بجررك غرقت

سكرت ودوبت

منه ما فوقت

ف حلاوته دوبت

وف حسنك توهت

لا منه شبعت

ولا يوم حرمت

ولا ثانية فكرت

أني أبعد وبعدت

أنا بعشقتك عشق

## ما تسعنيش

بصالح الدنيا ما صالحتنيش

بجري عليها مادتنيش

بنادي عليها ما سمعتنيش

قلبي يا قلبي ماتسبينيش

لأعمل ورقة ما ضيعنيش

وأفضل أكتب ما تنتهيش

وأرسم مهرة ماتسبقنيش

بحلم وحلمي ما يبسعنيش

وأغني بفرحة ما يهمنيش

دا حلم واحد ما يكفنيش

ضي نجمة ما يحوشنيش

نفسى ف قلب ما يسعنيش

طير و طليق ما يحرمنيش

حرية و حب

ما بتسعنيش

\*\*\*\*

## قلبي وكتب

قلبي وكتب عليه اسمك

ونبض حاير في قلبك

عاشق بيحلم لو ضمك

يلاقي دنيا ف ملامحك

جاية وهله ف أحلامك

ضي الليالي ف أيامك

ولاقي رسمي يشبهلك

ما تاهشي عنه نبضك

كل السنين بتحبك

جيبالي وياها مهرك

وإسمة طلة ف قمر ك

كتبالي كلمة منك

بحرف عارف صدقك

مواعدني أشتاق وأحبك

\*\*\*\*

## زهرة ياسمين

قلبي طفل بريء

شقي ورقيق

بيحلم يكون

وسط الكون

زهرة ياسمين

تغازل الشمس

بضي وهمس

وقلب حنون

بالهوى مفتون

مسكون بالعشق

بجلم التمني

يا حب غني

ارسم ملامحي

ف حلم جميل

وعمر طويل

أعشق بيه

نبض الحياة

\*\*\*\*

## نبذة عن الشاعر...

الشاعر علاء عامر.

من مواليد محافظة الغربية

ويعد ديوانه هذا الذي بين أيدينا وأشعاره المتنوعة في هذا الديوان التي تحكي

عن الحياة اليومية للإنسان البسيط في يومه.

وتنوعها بين النقدي والرومانسي وبساطته في مفرداته العامية يأتي بعد

ديوانه الأول "طبق كشري" وديوانه الثاني "أنا إنسانة".

\*\*\*\*\*

## محتويات الديوان

5	إهداء
6	زي الحاج
11	عيش الحياة..
13	قول يارب..
15	الخير شح
18	الناس الغلابة
20	شحات يا ناس
22	تيك أواي
25	السجلات..
27	لحظة صدق..
29	رغم الفراق..
31	آسف يا سي السيد
34	ولاحد..
37	نصدق مين..
39	بلياتشو..

41	تهمتي..
44	البال مشغول
46	أمي
50	عيشيني
52	في حاجات
54	وحشاني
56	ممکن تتجوزيني؟
59	أنت أيه؟؟
61	حلم
63	وحشتيني
66	الدنيا تلاهي
68	قلبي يا طير
70	يا صبية
72	فضلت أحبك
74	أنت الكسبان
78	البت
81	مين فينا

85	عارفة
88	صباح الورد
90	إزاي
94	فوات الأوان
100	بتنفسك عشق
101	ما تسعينيش
103	قلبي وكتب
105	زهرة ياسمين
107	نبذة عن الشاعر
108	محتويات الديوان

تم بحمد الله

## متابعة الشاعر على اليوتيوب

<https://www.youtube.com/channel/UCDfGGD765yddnTSdTJOvQbg>



**Amer** شاعر المرأة علاء عامر  
شاعر المرأة  
youtube.com

لحظة صدق

ديوان شعر عامية

علاء عامر



الطبعة الأولى

1442 هـ - 2020 م

دار ديوان العرب للنشر والتوزيع

مصر - بورسعيد

جوال: 00201211132879

E-mail: mohamedhamdy217217@gmail.com